

JAKINen harpidedunei eskaintza

«Euskal Herria» liburua

Gure argitalpen berezietan egin izan dugunari jarraituz, harpidedunei eskaintza interesgarri bat egin nahi diegu. Ez du, noski, inolako zentzu komertzialik; alderantziz, urteroko zuen leialtasunagatik ere ongi merezi duzuen aukera on bat eskaini nahi dizuegu: **Euskal Herria, Historia eta Gizartea** argitara eman berria da, Lan Kide Aurrezkiaren zilarrezko Ezteiak ospatuz eta *Jakin*-en idazkaritzatik gidatuta.

Jakin-en harpidedunentzat —Lan Kide Aurrezkiak eman digun erraztasunari esker— 300 ale dauzkagu prest. Denentzako ezin bada ere, eskeak jasotzen ditugun ordena berean bidaliko dira liburuak, esandako kopuru hori agortu arte. Liburudendetan 3.000 pezetatan salduko den hau, harpidedunontzat 2.000 pezetatan eskaintzen dugu. Apirilean balditzeko moduan izango garela uste dugu. Benetan interesaturik baldin bazaude, egizu eskea, lehenbailehen, eskuartean dugun 300eko kopuru hori agortu aurretik.

Liburuaren hitzaurrearekin esateko «*Euskal Herria* du obra honek izenburua, eta horixe da, bestalde, oso-osorik gaia ere. Euskal Herria bere barruti osoan hartuta esan nahi da: Hegoaldearekin batera, Iparralde; gainerako herrialdeekin elkartuta, Nafarroa, handi eta irekia. Bi liburukitan banatzen dugu gure iraganaren eta orainaldiaren berriemate hau. Eta zinezko elebitasun batekin eraman nahi izan da lana. Lankidego zabalak hartu du parte (aski du irakurle ikusminak aurkibideari begiratu bat ematea); eta hortxe, saiatu da bakoitza bere jakitateak modu labur eta trinkoan irakurleari eskaintzen».

Material aberatseko liburua da hau: 616 orrialde ditu, tamaina handian (28 × 21 cm). Letra txikian idatzia dago, eta marrazki eta argazki

irudizatua. Hemendik hilabete batzutara, bigarren liburukiarekin osatu den obra zabala da. Lehenengo honek batez ere azken gerraterainokoa aztertzen ditu, inoiz honago ere luzatuz. Bi liburukietan, 120 bat espezialista eta adituk partehartu du, gure Herriaren alderik ezberdinenen funtsezko jakinkizunak laburki aurkeztuz.

Lehen tomo honen barrunbea ezagutzeko, lasterbiderik onena liburak berak bere edukinaz ematen duen laburbilketa hemen jasotzea izan liteke. Hiru sailetan banatzen dira lehen liburuki honetako idazlanak:

1. **Euskal Herria: herri baten espazio-denborak.** *Espazio fisikoa.* Geologia, Geografia: Lur-Itsasoak. Ekosistemak, Giza Geografia, Egoitzak, Etxebizitza. *Gizaldien bariantan.* Antropologia, Historiariurrea eta Gizakiak, protagonista. *Lurralde historikoak.* Nafarroa, Araba, Gipuzkoa, Bizkaia, Iparraldea.

2. **Euskal Herria: Sormenaren barrutiak.** *Bizitza eta lana.* Ekonomia eta Erakundeak, Pentsamendua, Jakintza, Erljioa, Herriaren lana. *Artea eta Hitza.* Artelanak, Hizkuntza, Literatura. *Jolas eta joko.* Haurjokoak, Herri-kirolak.

3. **Euskal Herria: Krisialdia.** *Modernia zaila.* Hautabideak: Nazionalismoak, Sozialismoak. *Eraberritze-saioak.* Foruen deuseztapena; Hobakuntzak Kontzertuak eta Autonomia.

Puntu bakoitza (ekonomia, hizkuntza, etab.), sarritan lan bat baino gehiagotara zabaltzen da. Lankidego ederra bildu ahal izan da: 65 lagunen artean burutu da «Historia eta Gizartea»ri dagokion obraren lehen parte hau. Denak ezin emanik (ez bait gaitezke zerrenda osoa ematen has) ez gara aipu berezietan sartuko.

Hemen ematen diren lanei esker, gaur egun Euskal Herriaz dakizki-(ke)gunetan gure buruak gaurkotzeko bilduma on bat izango da. Milaka eta milaka datu aipagarri bildu dira hemen orrialde gutxitan. Irakasle, kazetari, ikasle nahiz jakin-min den nornahirentzat liburu baliagarria gerta daiteke, batez ere, agintzen denez, bigarren liburukian aurkibide analitiko xehatua ematen denean.